

Iluarsiissut

Saqqummiussissut 27. marts 2026-meersup taarserpaa

(Siunnersuutip qulequtaa qulequttallu nassuiaataani oqaaseqatigiinniik naqinnerliukkanillu iluarsiiisoqarpoq)

Uunga siunnersuut: Atuarfik pillugu Inatsisartut Inatsisaata allanngortinneqarnera pillugu Inatsisartut Inatsisaat

(Ilinniartitaanermut, Kultureqarnermut, Timersornermut Ilageeqarnermullu Naalackersuisoq)

Saqqummiussissut**Siullermeerneqarnera**

Naalackersuisut sinnerlugit matumuuna Atuarfik pillugu Inatsisartut inatsisaata allanngortinneqarnera pillugu Inatsisartut inatsisissaatut siunnersuut saqqummiuppara.

Naalackersuisooqatigiinnissamut isumaqatigiisummi allaqqavoq, meeqqat atuarfianni fagit ilinniartitsissutit amerlassusaat nalilersorneqassasut aamma Naalackersuisuusimasut Ilinniartitsinermut periusissiaanni allaqqavoq 2030 nallertinnagu nukarlerni fagit ikinnerussasut. Nukarliit ullumikkut fagini amerlavallaani atuartinneqartarnerisa kingunerisaannik ullup atuarfusup ingerlanerani allanngoqattaarnerit aamma pisariaqanngitsumik piffissaq eqqissisimanannginnerusoq ataqatigiinnngitsorlu atuartitsinerup nalaani pisartoq atuuttoq pillugu nalilersuineq taakkununga attuumassuteqarpoq. Fagit amerlasuut kingunerisinnaavaat atuartut patajaatsumik fagini pingaarnerni tunngavilerneqanngitsoornerannik. Tassani pineqarput atuartitsissutit atuartitsinermit tunngaviulluinnartutut isigineqartut, siullertut tassaasut kalaallit oqaasii aamma matematikki.

Nukarlerni atuartitsissutit suut pingaarnernerusut pillugit naliliineq, aammalu atuartitsinerup qanoq pitsaanerusumik pingaarnersiorneqassaneranik siunnersuut imaqarpoq, taamaalilluni atuartitsissutini pingaarnerusuni ukkatarinninnerup angusanillu pitsaanerusunik angusaqarnissamut siunertaqarluni. Peqatigisaanik atuartut atugarissaarnerat, qajannaatsuunerat inuttullu tamatigoortumik ineriartornerisa malunnaatilimmik nukittorsarnissaat kissaatigineqarpoq.

Tassunga atatillugu kalaallit oqaasiinik ilitsoqqussaralugu oqaatsinik ilinniartitsineq, atuarneq, allattarneq aammalu kisitsineq nukittorsarnissaat kiisalu atuartitsinermit pitsaanerusumik ataqatigiinnermik, itisiliinerunissamut pitsaassutsimillu pilersitsinissaq siunnersuutip siunertaraa. Tassunga atatillugu anguniagaq tassaavoq atuartut siusissukkat piginnaasanik pingaarnernik ilikkagaqarnissaat peqatigisaanillu atuarfimmi toqqissisimanerulerlutillu atugarissaarnerulernissaat.

Inatsisip allanngortinnerani siunertaq tassaavoq sulinermut qaninnerusumik sammisumik ataatsimut isigalugu atuarfimmik qulakkeerinninnissaq, nukarlerni atuartut oqaatsitigut matematikkimilu piginnaasaat nukittorsarneqarlutik peqatigisaanillu angajullerni atuartunut piviusorsioortumik kajumissaasumillu atuartitsinissamik neqerooruteqarsinnaaneq. Kiisalu siunnersuut malittarisassanik imaqarluni atuartunut taamatut aqqissuussinermut pisariaqartitsisunut sulinermut qaninnerusumik atuarsinnaanerit periarfissaalersillugu. Tassani pineqarpoq Naalakkersuisunut qinnuteqarnerup kingorna inuussutissarsiorneq pillugu klassinik inuussutissarsiornermut sammisumik ingerlataqarnissamik kommunit neqerooruteqarsinnaallutik periarfissaqalernerat.

Siunnersuut aamma maluginiarneqangaatsiarpoq, ilaatigut tusagassiorfinnit aamma tusarniaanerup nalaani malunnaatilinnik allannguutitik arlalinnik kinguneqarluni kiisalu siunnersuutip tusarniutigineqarneranik Naalakkersuisut sivitsuillutik pingaarnertut suliaqartartunik arlalinnik pissarsiffiusumik ataatsimiinnernik arlalinnik kinguneqartitsilluni.

Taamatut oqaaseqarlunga siunnersuut Inatsisartunut suliarineqartussanngorlugu tunniuppara.